



ACORDO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓN PÚBLICAS E XUSTIZA E O INSTITUTO GALEGO DE VIVENDA E SOLO DA CONSELLERÍA DE MEDIO AMBIENTE, TERRITORIO E VIVENDA PARA DESENVOLVER MEDIDAS PREVISTAS NO PACTO DE ESTADO CONTRA A VIOLENCIA DE XÉNERO

En Santiago de Compostela, 6 de marzo de 2019

REUNIDOS

Dunha parte: Alfonso Rueda Valenzuela, vicepresidente e conselleiro de Presidencia, Administracións Públicas e Xustiza, en virtude do Decreto 148/2016, do 13 de novembro, polo que se nomean os titulares dos departamentos da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa presidencia.

Doutra parte: Ángeles Vázquez Mejuto, conselleira de Medio Ambiente, Territorio e Vivenda e Presidenta do Instituto Galego da Vivenda e Solo (en diante, IGVS), en virtude da atribucións que lle confire o Decreto 94/2018, do 26 de setembro, do seu nomeamento (DOG nº 185, do 27 de setembro) e segundo o artigo 4 do Decreto 97/2014, de 24 de xullo, polo que se establece a estrutura orgánica do IGVS (DOG nº 147, do 5 de agosto).

Intervenien en función dos seus respectivos cargos e no exercicio das facultades que, para convir en nome das entidades que representan, teñen conferidas e,

EXPOÑEN

PRIMEIRO.- Que a Constitución española, no artigo 14, proclama o dereito á igualdade e á non discriminación ao establecer que as persoas son iguais ante a lei, sen que poida prevalecer ningunha discriminación por razón de nacemento, raza, sexo, relixión, opinión ou calquera outra condición ou circunstancia persoal ou social.

Do mesmo xeito, o Estatuto de Autonomía de Galicia encomenda aos poderes públicos galegos a obriga de promover as condicións para que a liberdade e a igualdade das persoas e dos grupos en que se integran sexan reais e efectivas, ademais de remover os atrancos que impidan ou dificulten a súa plenitude, facilitando a participación de todos e todas na vida política, económica, cultural e social. A Comunidade Autónoma galega ostenta competencias, con carácter exclusivo, tal e como se desprende do contido do artigo 27 do seu Estatuto de Autonomía, en materia de asistencia social e de promoción do desenvolvemento comunitario.



Así mesmo, a Comunidade Autónoma galega ostenta competencias, con carácter exclusivo, tal e como se desprende do contido do artigo 27 do seu Estatuto de Autonomía, en materia de vivenda.

SEGUNDO.- Que a Vicepresidencia e Consellería de Presidencia, Administracións Públicas e Xustiza, a través da Secretaría Xeral da Igualdade, é o órgano da Administración autonómica que ten entre as súas competencias impulsar as actuacións conducentes á promoción da igualdade e á eliminación da discriminación entre mulleres e homes, así como á eliminación da violencia de xénero

No mencionado ámbito material, a Lei 11/2007, do 27 de xullo, galega para a prevención e o tratamento integral da violencia de xénero, dispón a adopción en Galicia de medidas integrais para a sensibilización, a prevención e o tratamento da violencia de xénero, así como a protección e o apoio ás mulleres que a sofren.

TERCEIRO.- Por outra banda, o Pleno do Congreso dos Deputados aprobou por unanimidade, na súa sesión do día 15 de novembro de 2016, unha Proposición non de Lei pola que se instaba ao goberno a promover un Pacto de Estado en materia de violencia de xénero para impulsar políticas para a erradicación da violencia sobre a muller.

Así, constituíuse unha subcomisión no Congreso co obxectivo de elaborar un informe para identificar e analizar os problemas que impiden avanzar na erradicación das diferentes formas de violencia de xénero así como un conxunto de propostas de actuación, para dar cumprimento efectivo a ese fin; e un relatorio no Senado coa finalidade de estudar e avaliar os aspectos de prevención, protección e reparación das vítimas e analizar a estratexia para alcanzar e implementar un Pacto de Estado contra a violencia de xénero.

No mes de setembro de 2017, aprobáronse o Informe da Ponencia de Estudo para a elaboración de estratexias contra a violencia de xénero así como o Informe da Subcomisión para un Pacto de Estado en materia de Violencia de Xénero. Ambos informes, tras identificar a situación na que se atopa actualmente a loita contra a violencia de xénero en España e analizar os problemas que impiden avanzar na erradicación das diferentes formas da violencia, recollen un conxunto de propostas de actuación para os próximos anos. Entre estas inclúense especificamente as principais reformas que deben acometerse para dar cumprimento efectivo a ese fin, así como ás recomendacións dos organismos internacionais, Nacións Unidas e Consello de Europa. A partir deles articulouse o Pacto de Estado contra a violencia de xénero que consta de 10 eixes e un total de 292 medidas competencia tanto da Administración Xeral do Estado, como das Comunidades Autónomas e das entidades locais.

Finalmente, no Boletín Oficial do Estado do 4 de agosto de 2018 publicouse a Resolución pola que se publica o Acordo do Consello de Ministros polo que se formalizan os criterios de distribución e a distribución resultante do crédito para o desenvolvemento polas Comunidades Autónomas e Cidades con Estatuto de Autonomía do Pacto de Estado contra a violencia de xénero, consignándose a partir dese momento os fondos correspondentes nos orzamentos da Secretaría Xeral da Igualdade.

2





CUARTO.- O IGVS é o organismo autónomo adscrito á Consellería de Medio Ambiente, Territorio e Vivenda encargado de realizar a política de vivenda e solo da Xunta de Galicia, co fin de garantir os dereitos constitucionais a una vivenda digna e adecuada, segundo dispón o artigo 3 da Lei 3/1988, de 27 de abril de creación do IGVS, podendo, para o cumprimento destes fins, establecer convenios con entes públicos ou privados.

QUINTO.- O IGVS dispón dun programa de axudas denominado Bono de alugueiro social cuxo obxectivo principal é facilitar o acceso á vivenda en réxime de alugamento mediante axudas directas para o pagamento da renda do alugueiro. Tendo en conta o alcance das medidas propostas no Pacto do Estado contra a violencia de xénero, estimase oportuno ampliar o ámbito subxectivo deste programa ás vítimas da violencia de xénero, mediante a aplicación do financiamento previsto no citado Pacto de Estado.

SEXTO.- Dado que varias das medidas recollidas no Pacto de Estado, refírense a competencias específicas sectoriais que corresponde desenvolver, dentro da Comunidade Autónoma de Galicia, tanto á Vicepresidencia e Consellería de Presidencia, Administracións Públicas e Xustiza como ao IGVS, ambos os dous departamentos consideran conveniente asinar un acordo de colaboración, para unha xestión máis eficaz e eficiente das medidas a levar a cabo.

Por todo o exposto, as partes coinciden en instrumentar o seu acordo de vontades no presente Acordo de colaboración, de conformidade coas seguintes

CLÁUSULAS

PRIMEIRA.- Obxecto

Constitúe o obxecto deste acordo o establecemento das condicións polas que se rexerá a colaboración entre a Vicepresidencia e Consellería de Presidencia, Administracións Públicas e Xustiza e o IGVS, para desenvolver algunha das medidas previstas no Pacto de Estado contra a violencia de xénero que se refíren a asegurar a existencia de recursos habitacionais suficientes e dignos para as vítimas da violencia de xénero (medidas 75, 168 e 215 do documento refundido final do Pacto de Estado contra a violencia de xénero).

http://www.violenciagenero.igualdad.mpr.gob.es/pactoEstado/docs/Documento_refundido_PEVG_.pdf

SEGUNDA.- Compromisos das partes

O IGVS comprométese a xestionar unha liña de axudas destinada a facilitar o acceso a unha vivenda, en réxime de alugueiro, para as vítimas de violencia de xénero a través do programa do bono de alugueiro social



A estes efectos poderá establecer unha nova convocatoria ou incluír unha nova liña de axudas específica que mellore e amplíe algunha das convocatorias xa existentes.

En calquera dos casos, no texto da convocatoria deberá deixarse constancia de que as axudas están a ser financiadas con fondos do Pacto de Estado contra a Violencia de Xénero (Ministerio da Presidencia, Relacións coas Cortes e Igualdade), deixando constancia se fora o caso, na sinalización exterior dos lugares onde se realicen as accións, e sempre nas actividades de difusión, que estas se financian cos mencionados fondos (logotipo do Ministerio ademais do da Xunta de Galicia e demais logotipos estipulados pola CCAA).

A Vicepresidencia e Consellería de Presidencia, Administracións Públicas e Xustiza asume o compromiso de contribuír ao financiamento dos gastos necesarios derivados da realización do obxectivo deste acordo de colaboración, no importe e con cargo á aplicación orzamentaria que se sinala na cláusula seguinte.

TERCEIRA.- Financiamento

O importe total do presente acordo é de un millón seiscientos cincuenta mil euros (**1.650.000 €**), para a extensión e posta en marcha do programa do bono de alugueiro social para as vítimas da violencia de xénero, por un período de 12 meses. O orzamento será achegado pola Vicepresidencia e Consellería de Presidencia, Administracións Públicas e Xustiza con cargo á aplicación orzamentaria **05.11.313D.480.2 (Código de Proxecto 2018 00112)**, dos orzamentos da Secretaría Xeral da Igualdade para o ano 2019 e 2020, coa seguinte distribución plurianual.

FINANCIAMENTO VÍTIMAS DA VIOLENCIA DE XÉNERO	2019	2020	TOTAL
	975.000	675.000	1.650.000

Esta axuda poderá ser obxecto de dúas prórrogas anuais ás persoas beneficiarias iniciais, se así se establece na oportuna convocatoria que realice o IGVS, e sempre que se dispoña da correspondente dotación económica con cargo ao citado Pacto de Estado, sen que en ningún caso se poda superar a duración temporal do citado Pacto de Estado (31.12.2022).

Este importe será obxecto en cada anualidade da oportuna retención de crédito para transferencias e a dita transferencia dará lugar, unha vez asinado o acordo, a un expediente de ampliación de crédito que será tramitado polo IGVS na aplicación orzamentaria **07.83.451B.480.3**, e no código de proxecto específico que corresponde aos fondos finalistas do Pacto de Estado contra a violencia de xénero (**2018 00112**).

A devandita modificación orzamentaria instrumentarase a través dos correspondentes documentos contables que permitan as achegas entre departamentos da Xunta de Galicia (artigo 64.1.g do Decreto Lexislativo 1/ 1999, do 7 de outubro, polo que se aproba o texto refundido da Lei de Réxime Financeiro e Orzamentario de Galicia).

Os fondos transferidos a través do presente acordo destinaranse ao cumprimento do obxectivo establecido na cláusula Primeira, que queda condicionado ao efectivo financiamento destas axudas por parte do Ministerio da Presidencia, Relacións coas Cortes e Igualdade, no marco do Pacto de Estado contra a Violencia de Xénero.



CUARTA. Xustificación das Actuacións

O IGVS debe facilitar á Secretaría Xeral da Igualdade antes do 1 de febreiro das anualidades 2020 e 2021, a información necesaria sobre a execución financeira dos fondos transferidos, a través un certificado que se axustará ao modelo que figura como anexo ao presente Acordo de colaboración, así como os datos estatísticos precisos para o seguimento do programa, en concreto o número de solicitudes e de persoas beneficiarias desglosados por provincias, así como canta información resultara preciso para a avaliación final.

QUINTA.- Comisión de Seguimento

Coa finalidade de asegurar o cumprimento deste acordo, facilitar o seguimento da súa execución ou coñecemento de calquera cuestión sobre a súa interpretación, modificación, efectos ou a súa resolución, créase unha comisión mixta, que estará integrada por:

-Por parte da Vicepresidencia e Consellería de Presidencia, Administracións Públicas e Xustiza: A persoa titular da Secretaría Xeral da Igualdade, ou persoa que dispoña para que a substitúa, e unha persoa funcionaria da Subdirección Xeral para o Tratamento da Violencia de Xénero

-Por parte do IGVS: A persoa titular da Dirección Xeral do IGVS, ou persoa que dispoña para que a substitúa, e unha persoa funcionaria do IGVS

O réxime de funcionamento e os acordos da comisión axustaranse ao establecido no capítulo II Sección Terceira da Lei 40/2015, do 1 de outubro, de Réxime Xurídico do Sector Público, e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

SEXTA.- Vixencia

Este convenio estará vixente dende a data da súa sinatura ata o 31 de decembro de 2020.

As partes poderán modificar, sempre que sexa de mutuo acordo, ou denunciar o acordo en calquera momento.

SÉTIMA.- Réxime xurídico e resolución de conflitos

Este acordo de colaboración ten carácter administrativo, polo que os seus efectos rexeranse polo establecido nas súas cláusulas e, no seu defecto, pola normativa xeral que lle sexa de aplicación.

As cuestións litixiosas que poidan xurdir na interpretación e cumprimento deste acordo de colaboración, seranlle de aplicación o establecido no art. 18 da Lei 14/2013, de 26 de decembro, de Racionalización do Sector Público Autonómico.



OITAVA.- Consentimento das partes en materia de protección de datos.

As persoas asinantes deste acordo manifestan o seu consentimento para que os seus datos persoais que aparecen neste e mailo resto de especificacións nel contidas poidan ser publicados no Portal de Transparencia e Goberno Aberto.

Así mesmo as persoas asinantes deste acordo manifestan o seu consentimento para que as súas rúbricas deste consten nas copias que se remitan para a súa publicación no referido portal

E, en proba de conformidade cos termos do Acordo, as partes comparecentes asinan e rubrican por duplicado exemplar, no lugar e data indicados no encabezamento

O vicepresidente e conselleiro de
Presidencia, Administracións Públicas e
Xustiza



Alfonso Rueda Valenzuela

A conselleira de Medio Ambiente, Territorio e
Vivenda e Presidenta do IGVS

Ángeles Vázquez Mejuto



XUNTA DE GALICIA



[Handwritten signature]

ANEXO

En cumprimento do establecido no Acordo de colaboración entre a Vicepresidencia e Consellería de Presidencia, Administracións Públicas e Xustiza e a Consellería de Medio Ambiente, Territorio e Vivenda (Instituto Galego de Vivenda e Solo) para desenvolver algunhas das medidas previstas no Pacto de Estado contra a violencia de xénero, comunícanse os datos referidos á execución no ano 2019, das actuacións que se recollen no seguinte cadro:

Aplicación orzamentaria	Denominación Actuación	Asignación (Euros) (1)	Compromiso de Crédito (2)	Obrigas Recoñecidas (3)	Pagos Realizados (4)	Remanentes (1)-(2)	Obrigas Pendentes de Pago (3)-(4)
TOTAIS							

Vº Bº O/A Interventor/a

(sinatura e selo)

[Handwritten signature]

Lugar, data, de mes de 2019

O Director Xeral do IGVVS

(sinatura e selo)